

Bekungongaphansi nongaphezulu belwela ukuba ngompetha

SIBONGILE DLANGALALA

Abasebenzi boMnyango Wezemisebenzi Yomphakathi baveze amakhono abo ezemidlalo ngosuku lwezemidlalo lwalo Mnyango e-Richards Bay.

Kwakuphelele wonke amaHhovisi ezifunda kanye neNhlokoHhovisi ezinkundleni zemidlalo ezibizwa nge - Veld en Vlei Sport Complex.

Ngesikhathi befika ezinkundleni zemidlalo, abadlali babekhombisa omkhulu umdlandla futhi bethokozile ngoba ekugcineni lwase lufikile usuku ababekade belulangazelela.

Imidlalo yavulwa ngokusemthethweni nguMnu. Musa Mkhize ongusihlalo wekomidi lezemidlalo eMnyangweni.

Zathi zisuka nje, abadlali babemagange ukungena ezinkundleni balwela ukuba ngompetha.

Amaqembu ayebambe iqhaza kwakuyikuyiqembu lebhola lezinyawo (labesilisa kanye nelabesifazane) kanye nebhola lomnqakiswa.

Kwakubonakala ukuthi lawa maqembu ayekhethwe ngokwekhono kwazise nomdlalo ayewudlala wawukhombisa amathalente amangalisayo.

Nakuba amaqembu ayekhombisa amathalente amangalisayo, amanye amaqembu ayedlala kahle akhala ngaphansi kwagcina kusele "izingqungqulu"

ezabe sezidlulela esigabeni sowamanqamu.

Usuku lwaba ngenkulu impumelelo nokuyilapho abadlali bakhombisana amakhono amangalisayo kule midlalo eyayinzima.

Amaqembu adla umhlanganiso abe esenikezwa izinkomishi emcimbini wokukhishwa kwemiklomelo owawulindelwe ngamehlo abomvu.

Ababenqobile babecula besina bejabulela ukunqoba kwabo.

Abanqoba kwaba yiqembu lebhola lezinyawo labesifazane leHhovisi lesifunda saseThekwini, yiqembu lebhola lezinyawo labesilisa leHhovisi lesifunda esigwini oluseNyakatho kanye neqembu lebhola lomnqakiswa elalivikela isicoco eliphuma eNhlokoHhovisi elaphinda labuyela nayo futhi le nkomishi.

Ukuhlala ngokuzivocavoca kuba nomthelela omuhle kubasebenzi ekutheni benze umsebenzi oncomekayo futhi kwenza abasebenzi bahlale bephilile ngokomzimba nangokwengqondo, yingakho-ke uMnyango ugqugquzela ezemidlalo emsebenzini.

Kuphinda futhi kwenyuse nokuzethemba. Ngakho indawo yokusebenza ingaba yindawo ekahle yokudidiyela ezemidlalo kanye nezinye izindlela

zokunyakazisa umzimba. Njalo ngekwata uMnyango uba nosuku lwezemidlalo.

Ikomidi lezemidlalo lomnyango ledlulisa ukubonga kubaphathi ngokuhlala beleseka, kubo bonke ababebambe iqhaza ngokukhombisa kwabo ugqozi kanye nakubo bonke abasebenze ngokuzikhandla ukuqinisekisa ukuthi lo mqhudelwano uba yimpumelelo.



Abadle umhlanganiso Ebholeni Lomnqakiswa: INhloko-Hhovisi.



Abadla umhlanganiso Ebholeni Lezinyawo: Ihhovisi Lesifunda Esisogwini olusenyakatho. Izithombe: LIHLE BHENGU